

## 2000 Aña di Kiko?

Tempu nos tabata mucha, nos a kalkulá nos edat na aña 2000. No tin nodi di kalkulá mas. Aña 2000 ta aki!

Algun hende ta morto spantá, keriendo ku e fecha aki lo produsí tur sorto di katástrofe. Ta bèrdat ku problema di kompiuter POR okashoná interupshon di sierto servisio. Ma ningun eskperto sa sigur kiko lo sosodé.

Otronan ta konvensé ku eventonan ku Beibel a profetisá lo sosodé na aña 2000, manera binida di Kristo, Armagedón, fin di mundu, èts. Ta bèrdat ku algun evento profetisá por tuma lugá na aña 2000...meskos ku por a sosodé na aña 1997, 1998, 1999, i por sosodé na aña 2001, 2002, 2003, èts.

Dos mil no ta un sifra mágiko, profétiko, òf spantoso. E ta simpelmente un otro aña. Ma...2000 aña di kiko?

Mundu konosé diferente kalènder. E kalènder chines ta kuminsá na aña 2637 B.C., e fecha ku supuestamente emperador Huang-Ti a invent'è. Pues, segun nos konteo di aña, por bisa ku aña 2000 lo ta aña 4637. Kalènder muslim ta kuminsá ku aña A.D. 622, aña ku Muhammad a hui di Mecca pa Medina. Pues, segun nos kalènder, aña 2000 lo ta aña 1378. Kalènder hudiu ta kuminsá ku e tradishon ku Dios a krea mundu 5760 aña pasá. Pues, segun e kalènder aki, tampoko ta aña 2000.

Ken a inventá nos sistema ku awor lo ta aña 2000? Un monia, Dionysius Exiguus, na aña 532, a kalkulá e aña ku Hesus a nase i a kuminsá su konteo di aña ku e fecha ei. Kada aña despues el a yama *anno Domini* (ku na latin ta nifiká *den e aña di nos Señor*. E añanan promé ku Hesus a nase ta yamá B.C.

(Dionysius a kiboká. Segun arkeologíá, Herodes, e rei ku tabata ke mata e Beibi Hesus, a muri na aña 4 B.C. Hesus lo a nase 4 pa 6 aña promé ku Dionysius a kalkulá.)

Pues, aña 2000 simpelmente ta indiká ku Hesus a nase 2000 aña pasá. **Kada biaha ku bo ta bisa òf skirbi e fecha, bo ta rekonosé ku Hesus ta asina importante ku tur tempu ta basá riba Su Persona!**

**Hustamente Hesus na sentro di tempu!** Un òpstèl famoso onónimo entitulá *Un Bida Solitario* ta komuniká esaki bon kla.

“El a nase den un puebel poko konosí—yu di un kampesina. El a lamta den un otro puebel. El a traha den karpinteria te El a yega trinta aña di edat. Despues, pa tres aña, E tabata un predikadó ku a biaha di un lugá pa otro. E nunca tabata doño di un kas. E nunca a skirbi un buki. E nunca tabatin puesto. E nunca tabatin yunan. E nunca a studia na universidat. E nunca a bishitá un stat grandi. E nunca a biaha mas ku 200 mia for di e lugá ku El a nase. E nunca a hasi e kosnan ku normalmente hende sa asosiá ku grandesa. E no tabatin kredensialnan sino Su mes bida. Na edat di trinitres aña, e ola di opinion públiko a bira kontra dje. Su amigunan a bandon'E. Un di nan a neng'E. El a wòrdu entregá na Su enemigunan. El a wòrdu huzgá inhustamente. El a wòrdu klabá na krus meimei di dos ladron. Mientras E tabata muri, Su burdugunan a tira lòt pa Su úniko propiedat terenal—Su bisti. Ora El a muri, El a wòrdu poní den un graf fiá, dor piedat di un amigu.

“Mil nuebe shen aña a pasa, i te awe E ta e figura sentral di e rasa humano i e Lider di progeso di humanidat. Mi ta leu di kiboká ora mi ta bisa ku tur ehersito ku hamas a marcha, tur forsa naval ku hamas a nabegá, tur parlamento ku hamas a goberná, i tur rei ku hamas a reina, nan tur huntu no a afektá bida di hende riba mundu asina tantu ku e Un Bida Solitario aki.”

Aña 2000 ta históriko, **pasobra** nos ta kòrda ku 2000 aña pasá ku Hesus a nase, Esun ku Skritura a yama “Emanuel”, ku ta nifiká “Dios ku nos” (Mateo 1:23). Dos mil aña pasá **DIOS a bin biba ku hende, a impaktá historia di mundu, kalènder, i ke kambia bo destino eterno!**